



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XIX La vie & martyre des saints Marius, Marthe, Audifax, & Abacuc.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

18. IAN- VIER.
 peau, avec des ongles d'acier, & des tenailles de fer, entassant sur ce corps tédre, maux sur maux, & tourmens sur tourmens. En apres ils la ietterent dans vn grád feu qui ne brusloit point, pour faire voir que toutes les creatures obeyssent à nostre Seigneur, excepté l'homme, qui ayant receu le plus de sa beniste main est obligé de seruir par dessus tous les autres: & pour donner aussi à cognoistre que quand nostre Seigneur permet que les siens soient tourmentez, ce n'est pas qu'il ne les peút bien deliurer des peines, mais il desire plustost couronner la patience dont ils les endurent pour l'amour de luy. Ces preuues & victoires ne furent pas assez fortes pour faire que ce cruel tyran recogneut le vray Dieu en ceste sainte fille: au contraire imputant toutes ces merueilles à l'art Magique, & croyant que les Chrestiens les faisoient par la vertu des diables, il la fit conduire hors la ville, où elle eut la teste trachée. Et sainte Prisque laissant le monde remply de la tres-suaue odeur de son martyre, & admirée de sa pureté virginal, & genereuse constance qu'elle montra en si bas aage, alla iouyr au Ciel du guerdon de ses merites, où elle suit l'Agneau, & chante l'Hymne des loüanges que les seules Vierges peuuent chanter. Son corps fut enterré au chemin d'Ostie par les Chrestiens enuiron trois lieües de Rome le 18. de Ianuier, auquel l'Eglise celebre sa feste. Elle mourut sous l'Empire de Claude II.

La Chaire de saint Pierre à Rome. La mesme mourut sainte Prisque vierge, laquelle apres auoir souffert plusieurs tourmens, fut martyrisée sous l'Empereur Claude le Ienne. Au Pont en Asie decederent les sainctz Martyrs Moysé & Ammon soldats, lesquels ayans esté condamnés à tirer les metaux furent depuis bruslez. Au mesme temps saint Athenogenes ancien Theologien, lequel deuant estre ienté au feu, composa vn tres-bel hymne, qu'il laissa par escrit à ses disciples. A Tours en Touraine se fait la feste de saint Volusian Euesque, lequel prins par les Gois, mourut en exil: & de saint Leobard reclus, homme de merueilleuse abstinence & humilité. A Come en Lombardie trespassa sainte Liberate vierge.

LA VIE ET MARTYRE DES SAINCTZ
 Marius, Marthe, Audifax, & Abacut.



19. IAN- VIER.
 V téps de l'Empereur Claude II. il vint à Rome vn Gentil-homme de Perse nommé Marius, avec sa femme Marthe, & deux enfans qu'ils auoient nommez Audifax, & Abacut, tous quatre Chrestiens & grands seruiteurs de Dieu: le fuyet de leur pelerinage fut pour visiter les sanctuaires & Reliques de ceste sainte ville, particulièrement les corps des Apostres saint Pierre & saint Paul, qui sont reuerrez. Apres auoir accomply leur deuotion, ils s'adonnerent à visiter, secourir & consoler les Chrestiens qui estoient emprisonnez, & fort cruellemēt persecutez. Ils les encourageoient de leurs paroles, les sustantoient de leurs aumosnes, les seruoient de leurs personnes: & enscuelissoient avec grande deuotion & cha-

19. IAN- VIER.
 rité, ceux qui estoient morts pour la Foy: & estans vne fois allez à la prison lauer les pieds aux Chrestiens qui y estoient detenus ils ietterent les laueures sur leurs testes, à cause qu'elles auoient touché aux pieds de ceux qui enduroient pour Iesus-Christ. Comme ils s'occupoient en ces saintes ceuures avec tant de ferveur, l'Empereur les fit prendre, & les vouloit persuader d'adorer ses Dieux, & de renoncer la Foy de nostre Seigneur, mais les ayans trouuez fermes & prests à mourir, il enuoya leur procez à vn sien Lieutenant nommé Muscian, afin qu'il les tourmentast & fist mourir. Muscian fit despoillier le pere & les deux enfans, & en la presence de Marthe les fit fouetter avec des verges, & estendre sur le cheualet où on leur brusloit les flancs avec des torches ardées, puis on leur éraflait tout le corps avec des peignes de fer. Parmy ces tourmens les Sainctz estoient tousiours ioyeux, loüoient & glorifioient nostre Seigneur, pour l'amour duquel ils enduroient volontiers. La sainte femme & mere n'estoit pas moins resioüye, leur disant d'une face riante; Courage mes enfans. Ils leurs coupperent les mains, & les attacherent à leur col, les trainant par la ville avec vn Heraut, qui alloit disant à haute voix: Ne blasphemez pas les Dieux, & eux respondoient; Ceux que vous autres adorez ne sont pas Dieux, ains diables qui vous abusent, & vous font perdre, & vostre Prouince aussi. Et Marthe ramassoit le sang qui decouloit des membres de son mary & de ses enfans, dont elle se frottoit la teste, au grand contentement de son ame, qui brusloit au desir de mourir pour Iesus-Christ. En fin ils les tirerent hors la ville, & leur trancherent les testes en vne sablonniere, puis bruslerent leurs corps, de peur qu'ils ne fussent honorez des Chrestiens, & ietterent Marthe dans vn puits, où elle mourut. Vne sainte Matrone nommée Felicite print les corps des trois Sainctz à demy bruslez, & les enterra en vn sien heritage, & tirant le corps de Marthe du puits, le mit avec celuy de son mary & de ses enfans, le 19. de Ianuier de l'an cent septante, auquel iour l'Eglise celebre la Feste de ces Martyrs: Dieu par leur intercession fit de grands miracles, & beaucoup de faueurs à ce village. Depuis on transféra leurs corps Sainctz à l'Eglise de saint Adrian Martyr, où au temps du Pape Sixte V. comme escrit le Cardinal Baronius, ils furent trouuez avec d'autres corps Sainctz, qui furent portez en grande reuerence & affluence de tout le peuple Romain.

A Rome sur le chemin de Cornille endurerent les sainctz Marius & Marthe, mary & femme, avec leurs enfans Audifax & Abacut Gentils-hommes Persans, lesquels estans allez par deuotion à Rome du temps de l'Empereur Claude, y furent premierement bien bastonnez, puis endurerent le cheualet, les ongles de fer, le feu, & eurent les mains couppees. Marthe fut estouffée en vn lieu nommé Nympha, les autres decapitez. & tous leurs corps reduits en cendres. A Smyrne saint Germanique martyr, lequel en la fleur de sa jeunesse, sous Marc Aurele Antonin, & Luce Aurele, assisté de la faueur diuine, chassa loing de soy toute crainte & respect humain, agaçant la beste à laquelle il estoit exposé par sentence du Iuge, & par les dents de laquelle il fut deschiré & moulu, pour

estre incorporé au vray pain, qui est Iesus-Christ nostre Sauueur. En Afrique descederent les Saints Martyrs Paul, Geronce, Iannier, Saturnin, Successe, Iule, Cato, & deux femmes Pie & Germaine. En l'Isle de Cypre saint Theodore, qui endura beaucoup sous Licinie, & puis mourut en paix. A Lodi en Lombardie trespassa saint Basilian Euesque & Confesseur, lequel combattit valeureusement contre les heretiques de son temps, avec saint Ambroise, Archeuesque de Milan.

LA VIE DE SAINT FABIEN,

Pape & Martyr.

20.
I A N
V I E R.

SAINT Fabien Pape estoit Romain de nation. Son pere se nommoit Fabius. Son election au souverain Pontificat fut par vne reuelation particuliere de Dieu, comme dit saint Eusebe; car le peuple & le Clergé Romain s'estant assemblé apres la mort de saint Antere Pape & Martyr, pour eslire vn successeur, suiuant la coustume de ce temps-là, & se trouuant plusieurs diuers aduis en la nomination de celui à qui on deuoit fier ceste suprême dignité, les vns en propofans vn, les autres vn autre, il arriva que Fabien venant des chaps avec quelques vns de ses amis entra en l'Eglise, & desira scauoir l'estat de l'affaire, & qui auoit esté nommé pour souverain Pasteur de tous, & lors qu'il ne pensoit en rien moins, il descendit soudain vn pigeon du Ciel (qui sembloit représenter celui qui vola sur nostre Redempteur Iesus-Christ au fleuve Iordain, apres son sacré Baptesme) qui se vint asseoir sur la teste de Fabien. Chacun tourna lors les yeux sur luy, & cognoissant que cela n'estoit point par vn cas fortuit, ains par vne singuliere providence de Dieu, qui leur vouloit manifester sa volenté, & celui qu'ils deuoient choisir pour Pere, Maistre & Pasteur vniuersel de l'Eglise, touché de l'esprit de Dieu, ils esleurent tous d'vne voix Fabien Pape, & l'asseirent en la chaire de saint Pierre. En son temps l'Empereur Philippe se conuertit à la Foy de nostre Seigneur Iesus-Christ, & fut le premier Empereur Chrestien: & Fabien auoit tant d'autorité enuers luy (car l'obeissance & le respect que les Chrestiens doiuent porter à leurs Superieurs Ecclesiastiques estoient lors en vigueur) que l'Empereur voulant entrer en l'Eglise vn iour de Pasques, pour y faire ses deuotions avec les autres Chrestiens, & recevoir le corps de nostre Seigneur Iesus-Christ, le saint Pape ne luy permit, iusques à ce qu'il eust fait penitence publique de certains pechez qu'il auoit commis. L'Empereur la fit, & obeit avec vne grande humilité, comme le mesme Eusebe l'escrit en l'Histoire Ecclesiastique. A cause de la conuersion de l'Empereur à nostre sainte Foy, Fabien iouyt quelque temps de la paix faisant reparer durant ce repos quelques Eglises ruinées es persecutions qui auoient couru, & fit bastir des sepultures pour les Martyrs, & autres semblables choses, vtils & propres aux fidelles: pour la decence & ornemēt de l'Eglise. Il depar-

tit la ville de Rome avec ses Paroisses à sept Diacres, institua autres sept Souf diacres, comme surintendans des sept Notaires establis par son predecesseur Antere, qui auerassent & escriuissent entierement les tourments des Saints Martyrs. Il escriuit quelques Epistres fort sententielles & graues, qui se trouuent au premier Tome des Conciles, encore qu'on ne soit asseuré si la premiere est de luy. Il fit certains Decrets dont l'vn est que le Cresme se consacraست tous les ans le Ieudy Saint, & que ce qui en resteroit de l'an passé soit bruslé ou consummé. Il commada que les Iuges seculiers ne se messassent aucunement des causes Ecclesiastiques. Il defendit le mariage entre les parens par alliance, iusques au cinquieme degré, & que ceux qui sont mariez dans le quatriesme ne soient pas rōpus. Que tous les fidelles cōmuniasent au moins es trois principales Festes de l'an, & autres qui se trouuent au liure des Conciles & au Decret. Il tint cinq fois les Ordres au mois de Decembre, & fit vingt-deux Prestres, sept Diacres, & en diuers Dioceses onze Euesques. En fin Decie ayāt fait mourir l'Empereur Philippe & son fils qui s'appeloit Philippe cōme son pere, & vsurpé l'empire, sous pretexte de l'inimitié qu'il leur portoit, cōuoiteux d'auoir leurs thresors qu'on luy dit qu'ils auoient laissez à l'Eglise, il cōmença à la persecuter, & à resprendre le sang des Chrestiens, entre lesquels le saint Pontife Fabien fut aussi couronné du martyre le 20. de Ianuier de l'an 253. apres auoir tenu la Chaire de saint Pierre, selon Damase quatorze ans, vn mois & onze iours: & selon Baronius quinze ans & quatre iours.

LA VIE DE SAINT SEBASTIEN,

Martyr.



SE tres-valeureux Martyr de Iesus-Christ, saint Sebastien eut pour pere vn Gentil-homme François de la ville de Narbonne, & pour mere vne Dame natieue de Milan, & de là (peut-estre) est née la dispute qui est entre ces deux villes, à scauoir, laquelle est la propre patrie de ce bon Saint; car quelque Saint que ce soit, mais principalement vn signalé & remarquable, comme fut saint Sebastien, peut beaucoup honorer & annoblir sa patrie, & luy procurer de grandes faueurs de nostre Seigneur, & elle se peut vanter d'auoir porté vn tel fils & citoyen. Peut bien estre que saint Sebastien nasquit en la ville de Narbonne, comme son pere, & qu'il fut nourry à Milan, comme sa mere, & Rome se prise de tenir ses Reliques, & d'auoir esté teinte de son sang. Il ne se dit riē d'asseuré de l'enfance & instruction de saint Sebastien: voicy ce que ie trouue escrit de sa vie par des graues & anciens Auteurs.

Il viuoit du tēps des Empereurs Diocletian & Maximian, ennemis capitaux de Iesus-Christ: c'estoit vn braue soldat, noble, discret, & qui auoit tant de bonnes parties, que l'Empereur Diocletian le fit Capitaine de la premiere cohorte, ou